

現代生活藝術系列

華嚴經疏論纂要 21

— 四聖諦品

華藏淨宗學會印贈

大方廣佛華嚴經疏論纂要卷第二十一

五臺山清涼國師澄觀疏鈔

太原方山長者李通玄 論

闕鼓山私淑比丘道需纂要

四聖諦品第八

○釋此一品。五門分別。初來意。

〔疏〕來意者。此品廣前種種語業。卽答前佛說法問。亦遠答前會佛演說海之一問故。上知佛可歸。次知法可仰。又名隨物立法。逐機差。故次來也。

○二釋名

〔疏〕釋名中言四聖諦者。聖者正也。無漏正法。得在心故。諦有二義。一者諦實。二者審諦。言諦實者。此約境辨。謂如所說相。不捨離故。真實故。決定故。謂世出世二種因果。必無虛妄。不可差失。言審諦者。此就智明。聖智觀彼。審不虛故。凡夫雖有苦集而不審實。不得稱諦。無倒聖智。審知境故。故名聖諦。故瑜伽九十五云。由二緣故名諦。一法性故。二勝解故。愚夫有初無後。聖二具故。偏說聖諦。四謂苦集滅通。總云四聖諦。帶數釋也。〔鈔〕瑜伽下引證二義。法性是諦實。勝解是審諦。性相云何。逼迫名苦。卽有漏色心增長名集。

卽業煩惱寂靜名滅。謂卽涅槃。出離名道。謂止觀等。此約相說。通大小乘。智論云。小乘三是有相滅。是無相。大乘四諦皆是無相。性相云何。下辨體相。初通有天台四四諦意。四四諦者。一。生滅四諦。二。無生四諦。三。無量四諦。四。無作四諦。依常所釋。但有其二。或名有作無作。或名有量無量。有作有量。卽是小乘。無作無量。卽是大乘。今以義開。故成四。如初卽生滅四諦。文分爲二。初正明。然句皆二。義如逼迫名苦。卽釋別名。二。以當辨相。逼迫身心。是苦行相。故二。卽有漏色心者。正出體也。色心卽五蘊。心是四。故五盛陰苦。故不攝無爲。故增長名集。是釋名相。積集增長。故卽業煩惱者。出體下二。諦例知。而道云等者。等取入正道等。此約相說者。二結屬生滅四諦也。然四諦有相有性。上所辨性。是相性也。下說無相。是真性也。智論云。下引證。通大小乘。亦是結前生後。結前是生滅四諦。大乘四諦。

皆無相下。生後。涅槃云。解苦無苦。名苦聖諦。謂達無生四諦也。

四緣生故空。則超筌悟旨成大。又涅槃云。凡夫有苦而無諦。二乘有苦。有苦諦。而無真實。菩薩無苦。有諦而有真實。謂若苦即諦。三塗之苦。豈即諦也。

二乘雖審知之。而不達法空。不見真實。涅槃云下。具。應云。解集無和合。名集聖諦。解滅無滅。解道無道等。影在次文。謂達四下。二以義釋經云。何言無生四諦。從緣無性空故。名之為無。非斷無也。滅雖無為。因滅惑顯。亦曰從緣。則超筌悟旨成大者。苦集滅道。以為空筌。其猶筌筌。以求魚兔。無相空理。即為魚兔。得魚忘筌。是悟空旨。便成大乘。非離四外別有大也。如非離筌而得魚矣。又涅槃云下。三引經證成大小別義。雙證生滅及無生也。經云。善男子。以是義故。諸凡夫人。有苦無諦。聲聞緣覺有

苦有苦諦而無真實諸菩薩等。解苦無苦。是故無苦而有真諦。諸凡夫人。有集無諦。聲聞緣覺。有集而有真諦。而無真實。諸菩薩等。解集無集。是故無集而有真諦。聲聞緣覺。有滅非真。菩薩摩訶薩。有滅有真諦。聲聞緣覺。有道非真。菩薩摩訶薩。有道有真諦。故引此經。兼釋解苦無苦下之三句。言謂若苦即諦下。釋經凡夫無諦之言。涅槃四諦品云。佛復告迦葉。所言苦者。不名苦聖諦。何以故。若苦是苦聖諦者。一切畜生及地獄衆生。應有聖諦。亦即思益經文。此無諦言。約審諦說。不約諦實。若約諦實。三塗實苦。二乘雖審知之下。釋二乘有諦無實之言。有審諦故。如實知苦。不同凡夫。妄計爲樂。無實可。又二乘雖知苦相。不知無量相。故大經云。苦有無量相。非諸聲聞緣覺所知。瑜伽說苦有一百一十。然此經中雖彰名異。即表義殊。以名必召實故。是無量四諦義也。約一界一諦。即有十千。娑婆

四諦。有四百億十千名義。而文義包博。言含性相。又二乘下。第三無量四諦。疏文有三。初牒上立理。前不見法空苦性。故無真實。此不知無量。不見相。故亦非見實前。卽理智。故但見生空。不及菩薩。此卽量智。故但知粗相。不及菩薩。故大經下。二引文證成。迦葉白佛言。世尊。昔佛一時在。恒河岸尸首林中。爾時如來。取少樹葉。告諸比丘。我今手中所捉葉多。一切因地草木葉多。諸比丘言。世尊。一切因地草木葉多。不可稱計。如來所捉。少不足言。諸比丘。我所覺。了一切諸法。如因地生草木等。爲諸衆生所宣說者。如手中葉。迦葉難言。如來所了無量諸法。若入四諦。則爲已說。若不入者。應有五諦。佛讚迦葉善哉善哉。汝今所問。則能利益安隱。快樂無量衆生善男子。如是諸法。悉已攝在四諦法中。迦葉復白佛言。如是等法。若在四諦。如來何故唱言不說。佛言。善男子。雖復入中。猶名不說。何以故。善男子。知聖諦有二種智。一者中。二者上。中者聲聞緣覺。上者諸佛菩薩。善男子。知陰爲苦。名爲中智。分別諸陰。有無量相。悉是諸苦。非是聲聞。

緣覺所知。是名上智善男子。如是等義。我於彼經。竟不說之。次歷入界。皆如陰說。又別歷色等五陰。一皆言有無量相。此是無量四諦意也。瑜伽說苦有一百一十。即四十四論。增數明之。又究此四。非唯但空。便為真實。今了陰入皆如。無苦可捨。無明塵勞。即是菩提。無集可斷。生處即涅槃。無滅可證。邊邪皆中正。無道可修。無苦無集。即無世間。無滅無道。即無出世間。不取不捨。同一實諦。又下。無作四諦。亦三。初總明。言非唯但空者。揀上無生。但顯空義。便為真實。正是所宗。今了了。二別示四相。陰入皆如者。前云即空。今云即如。理已別矣。又言無苦可捨。非是空故。無有可捨。今體即如。如外無苦。何所捨耶。此句言如。如尚似空。集言無明塵勞。皆即菩提。豈同前空苦。菩提體外。無別可斷。不同無生。空無可斷。前則空中無羣。云何可斷。今則波即是水。不得除波。下二諦例然。生處即涅槃。

非是體空無生滅也。邊邪皆中正者。非離邊外別有中道。非離邪外別有正道。亦非無邊無邪。無可修也。細尋可。見勿濫無生。故斯一品。有作無作。有量無量。皆在其中。準下第五地中。復以十重觀察。至下當明。

○三宗趣

疏宗趣者。以無邊諦海。隨根隨義。立名不同。徧空世界。以此爲宗。務在益物調生爲趣。又上二皆宗發生淨信爲趣。

○四解妨難

疏問。旣彰佛語業。答說法問。佛所說法多門。何以唯陳四諦。答。以名雖在小。義通大小。事理具足。謂

苦集二諦是世間因果所知所斷。無改易故。滅道
兩諦出世間因果。所證所修。事決定故。知斷證修。
能運衆生到彼岸故。世界有異。此獨無改。況無量
無作。何義不收。是故約此以顯差別。又爲破計引
機故。謂演彼聲聞四諦局法。令亡所執。引入一乘
無邊諦海。故約此辨。何以四諦皆帶苦言。謂苦滅
聖諦等。然謂生苦之集。故云苦集。盡苦之滅。各爲
苦滅。至苦滅之道。各苦滅道。不得單言苦道。以道
非生苦。不同集故。又非滅苦。不同滅故。能證苦滅
故云苦滅道。

論於此一品之中。義分爲三。一釋品名目。二釋品來意。三隨文釋義。一釋品名目者。諦者實義也。明如來說四種實義。令諸衆生起信解故。問曰。何故不說多。但云四。答曰。此四種諦義。總攝多故。爲明一切世間。不離苦集。一切出世間。不離滅道。三乘四諦。厭苦集。欣滅道。名四諦法輪。此一乘經言四聖諦者。是其實義。何以故。達苦性真。無欣厭故。以是義故。一乘四聖諦。三乘四諦。各各差別。各有信解。如來依根。方便設教。皆非凡夫能立。如今修道者。但隨自信解力。便處卽作。不可例然。如法華經。

爲聲聞人說四諦法。爲緣覺人說十二因緣。爲諸菩薩說六波羅蜜。亦是如來隨時之說。如此經十地品。五地菩薩作十種諦觀。以四聖諦爲體。六地菩薩作十種十二緣生觀。此是如來隨位進修之法。大要總言。此四聖諦。十二緣生法門。但一切諸聖。一切凡夫。起信樂佛法心。道未滿者。皆從初心。觀自他苦故。發菩提心。樂求道法。但依大小勝劣不同。四諦十二緣各別。二釋品來意者。爲明前名號品。是說如來身業。隨方名號不同。此品說如來隨方語業。說法不離四聖諦故。此品須來。三隨文

釋義者。於此一品經文。於中總有十二段經。如文具明。

○五正釋文。一品分二。先標告。二諸佛子下。正顯於中分四。初娑婆諦名。二隣次十界。三類通一切。四主伴無窮。然此望前品。畧於單說四洲。就初二中。一一方內文各有二。一別列諦名。二結數辨意。然其立名。或有因從果稱。果藉因名。約事約理。或總或別。如文當知。今初娑婆。

爾時文殊師利菩薩摩訶薩。告諸菩薩言。

諸佛子。苦聖諦。此娑婆世界中。或名罪。或名逼迫。或

名變異。或名攀緣。或名聚。或名刺。或名依根。或名虛
誑。或名癰瘡處。或名愚夫行。諸佛子。苦集聖諦。此娑
婆世界中。或名繫縛。或名滅壞。或名愛著義。或名妄
覺念。或名趣入。或名決定。或名網。或名戲論。或名隨
行。或名顛倒根。諸佛子。苦滅聖諦。此娑婆世界中。或
名無諍。或名離塵。或名寂靜。或名無相。或名無沒。或
名無自性。或名無障礙。或名滅。或名體真實。或名住
自性。諸佛子。苦滅道聖諦。此娑婆世界中。或名一乘。
或名趣寂。或名導引。或名究竟無分別。或名平等。或
名捨擔。或名無所趣。或名隨聖意。或名仙人行。或名

十藏諸佛子。此娑婆世界說四聖諦。有如是等四百億十千名隨衆生心。悉令調伏。

〔疏〕娑婆中列內四諦卽爲四別。一苦云罪者。摧也。謂摧壞色心故。二逼迫者。不可意境。逼迫身心也。此二總顯。三變異者。壞苦也。攀緣者。追求苦也。聚者。五盛陰苦也。刺者。從喻立名。如刺未拔。依根者。由苦能生一切惡也。虛誑者。於下苦中能生樂想也。癰瘡處者。此喻二苦。有癰瘡處。性自是苦。此如五陰苦。若加手等觸。苦上加苦。是苦苦也。愚夫行者。行苦也。愚人所行故。如以睫毛。置掌不覺。若置

目內爲苦不安。愚夫不覺行苦。如掌內之毛。而復以苦反欲捨苦。皆愚大行也。鈔如一睫毛者。全是毛。置掌人不覺。若置眼睛上。爲苦反不安。凡夫如手掌。不覺行苦。睫智者如眼睛。緣極生厭怖。而復以苦者。卽法華經第一云。不求大勢佛。及與斷苦法。深入諸邪見。以苦欲捨苦。爲是衆生故。而起大悲心。二集中初二通顯。謂有業惑者。繫縛三界。滅壞善根。次二別顯煩惱餘多通業惑。三苦滅中。無諍者。煩惱爲諍。故體真實者。非唯惑滅而已。實乃法身常住。爲滅諦之義。故次云。任自性者。謂本來滅。故。次云。任自性者。證成上文體真實義。則體真實。揀非虛妄。及非空無。任自性言。卽是法任法正位也。本來寂滅。卽成上文任自性義。四苦滅道諦。云十藏者。謂信聞

等。如十藏品說。二結云。四百億十千者。望前名號。一四洲有十千。今一四天下。諦亦有十千。四諦歷於百億。故有四百億箇十千。隨衆生心下。顯差別之意也。

○第二隣次十界卽爲十段

諸佛子。此娑婆世界所言苦聖諦者。彼密訓世界中。或名營求根。或名不出離。或名繫縛本。或名作所不應作。或名普鬪誣。或名分析悉無力。或名作所依。或名極苦。或名躁動。或名形狀物。諸佛子。所言苦集聖諦者。彼密訓世界中。或名順生。或名染著。或名燒。

然。或名流轉。或名敗壞根。或名續諸有。或名惡行。或名愛著。或名病源。或名分數。諸佛子。所言苦滅聖諦者。彼密訓世界中。或名第一義。或名出離。或名可讚歎。或名安隱。或名善入趣。或名調伏。或名一分。或名無罪。或名離貪。或名決定。諸佛子。所言苦滅道聖諦者。彼密訓世界中。或名猛將。或名上行。或名超出。或名有方便。或名平等眼。或名離邊。或名了悟。或名攝取。或名最勝眼。或名觀方。諸佛子。密訓世界說四聖諦。有如是等四百億十千名。隨衆生心。悉令調伏。

疏一密訓世界。卽東方界也。苦名分析悉無力者。

推之於緣。無實物也。形狀物者。有形皆苦也。集中

病源者。謂有攀緣故。鈔病源者。即淨名第二云。何

則為病本。下文云。何斷攀緣。以無所得。若無所得。則無攀緣。釋曰。正引病本。無得因便。滅云

一分者。惑由妄起。故分數塵沙。理不可分。故稱一

分。道言上行者。所之在滅。所之在滅者。滅為最上

為上。言觀方者。謂觀四諦也。更有四方。如十定品

更有四方者。即第四十二。阿耨達池。喻中合地。四

方云。佛子。何者。名為菩薩四方。所謂見一切佛。而

得開悟。一也。聞一切法。受持不忘。二也。圓滿一切

波羅密行。三也。大悲說法。滿足衆生。四也。釋曰。若

諸佛子。此娑婆世界所言苦聖諦者。彼最勝世界中

觀此四為菩薩道也。

或名恐怖。或名分段。或名可厭。惡。或名須承事。或名
變異。或名招引冤。或名能欺奪。或名難共事。或名妄
分別。或名有勢力。諸佛子。所言苦集聖諦者。彼最勝
世界中。或名敗壞。或名癡根。或名大冤。或名利刃。或
名滅味。或名仇對。或名非已物。或名惡導引。或名增
黑暗。或名壞善利。諸佛子。所言苦滅聖諦者。彼最勝
世界中。或名大義。或名饒益。或名義中義。或名無量。
或名所應見。或名離分別。或名最上調伏。或名常平
等。或名可同住。或名無爲。諸佛子。所言苦滅道聖諦
者。彼最勝世界中。或名能燒然。或名最上品。或名決

定。或名無能破。或名深方便。或名出離。或名不下劣。
或名通達。或名解脫性。或名能度脫。諸佛子。最勝世
界說四聖諦。有如是等四百億十千名。隨衆生心。悉
令調伏。

〔疏〕二最勝世界者。卽是南方。前名豐溢。豐溢是正
翻。最勝乃義譯耳。苦名有勢力者。生老病死。猶四

山臨人。世雖賢豪。力無與競。鈔生老病死者。淫槃
喻云。云何非喻。如我昔告波斯匿王云。大王。有親
信人。從四方來。各作是言。大王。有四大山。從四方
來。欲害人民。王若聞者。當設何計。王言。世尊。設有
此來。無逃避處。唯當專心持戒布施。我卽讚言。善
哉。大王。我說四山。卽是衆生。生老病死。生老病死。
常來切人。云何大王。不修施戒。卽其事也。故賢與

不肖。豪強羸弱。同爲四遷。一、無脫者。梵王帝釋。貧窮下賤。堯舜桀紂。二皇四凶。併歸灰壤。皆爲苦依。集名非已物者。已本性淨。妄惑何預。滅名義中義者。事善有義。滅理尤勝。義中義也。道名燒然。以智慧火。燒煩惱故。

諸佛子。此娑婆世界所言苦聖諦者。彼離垢世界中。或名悔恨。或名資待。或名展轉。或名住城。或名一味。或名非法。或名居宅。或名妄著處。或名虛妄見。或名無有數。諸佛子。所言苦集聖諦者。彼離垢世界中。或名無實物。或名但有語。或名非潔白。或名生地。或名執取。或名鄙賤。或名增長。或名重擔。或名能生。或名

麤獷。諸佛子。所言苦滅聖諦者。彼離垢世界中。或名無等等。或名普除盡。或名離垢。或名最勝根。或名稱會。或名無資待。或名滅惑。或名最上。或名畢竟。或名破印。諸佛子。所言苦滅道聖諦者。彼離垢世界中。或名堅固物。或名方便分。或名解脫本。或名本性實。或名不可毀訾。或名最清淨。或名諸有邊。或名受寄全。或名作究竟。或名淨分別。諸佛子。離垢世界說四聖諦。有如是等四百億十千名。隨衆生心。悉令調伏。

〔疏〕三西方離垢世界。苦名無有數。三際無涯故。集名增長者。從惑生惑業故。

鈔從惑生惑業者。卽俱含頌。具云。從惑生惑業。

從業生於事。從事事惑生。有支理唯此。此偈六地當釋。今但要此句。從惑惑生。惑者謂從愛生取也。從惑生業者。即從取生有。及無明生。減名稱會者。以行事即是苦。今但說集。唯舉惑業。減名稱會者。以事之滅。稱會理滅。故破印者。世之陰苦。若臘印印泥。印壞文成。此陰纔滅。彼陰續生。今云破印。永不生也。道名諸有邊者。照實即生。生可盡也。故中論云。真法及說者。聽者難得。故是。故即生。生非有邊。無邊。謂三事難得。故非有邊。難得者。容有得義。得則生。生有邊。受寄全者。業寄於集。暫受還亡。業寄於道。永不可失。照實等者。立理。故中論下。引證。先舉偈文。即邪見品。先有得云。若世間有邊。云何有後世。若世間無邊。云何有後世。上反釋。次云。五陰常相續。猶如燈火焰。以是於世間。

不應邊無邊。釋曰。以緣生性空。故不屬邊。無邊復次。如中百觀說。眞法及說者等。此約相說。不遇因緣。則生。如無邊。遇則有邊。此有三事。一。眞法。如良藥。二。說者。如良醫。三。聽者。如可治之病。若具此三。煩惱病愈。生。如可盡。盡即是邊。不具此三。煩惱治。然。生。如無。斯則無邊。故結云。非有邊。非無邊也。謂三事下。疏釋上偈。即影公意。彼疏云。難得。故非有邊。難得。故非無邊。言猶難見。故取意釋。夫言難得。非全不得。若全不得。一向無邊。今有得者。得則有邊。以難得。故則無邊耳。此亦約一人而說。若總望一切。難有其邊。業寄於集者。設修善業。有漏心修。是寄於集。因盡報謝。故云還亡。無漏心修。是寄於道。道符於理。直趣菩提。

諸佛子。此娑婆世界所言苦聖諦者。彼豐溢世界中。或名愛染處。或名險害根。或名有海分。或名積集成。或名差別根。或名增長。或名生滅。或名障礙。或名刀。

劍本。或名數所成。諸佛子。所言苦集聖諦者。彼豐溢
世界中。或名可惡。或名名字。或名無盡。或名分數。或
名不可愛。或名能攫噬。或名麤鄙物。或名愛著。或名
器。或名動。諸佛子。所言苦滅聖諦者。彼豐溢世界中。
或名相續斷。或名開顯。或名無文字。或名無所修。或
名無所見。或名無所作。或名寂滅。或名已燒盡。或名
捨重擔。或名已除壞。諸佛子。所言苦滅道聖諦者。彼
豐溢世界中。或名寂滅行。或名出離行。或名勤修證。
或名安隱去。或名無量壽。或名善了知。或名究竟道。
或名難修習。或名至彼岸。或名無能勝。諸佛子。豐溢

世界說四聖諦。有如是等四百億十千名。隨衆生心。悉令調伏。

疏四北方豐溢世界者。豐溢自南方界名。前品此

方名爲豐樂。梵云微部地。田夷切豐樂得有。譯者不

審。二名相參耳。苦名有海分者。二十五有。各一分

也。數所成者。數體卽集。集所成故。顯云二十五有者

趣梵王六欲天。無想五那含四空并四禪廣如涅槃十四數體卽集者。有爲之法。總名爲數。亦心數

也。今總中取別。云卽集也。集名分數者。無一理以貫之。則惑業

萬差矣。攫噬者。攫搏也。噬嚙也。集之損害。猶惡禽

獸也。無一理者。生公云。凡順理生心名善。乖背爲惡。萬善理同而相兼。惡異而域絕。卽斯義矣。

滅名無所修者。修已極故。道名無量壽者。謂證滅
永常。今因標果稱。

諸佛子。此娑婆世界所言苦聖諦者。彼攝取世界中。
或名能劫奪。或名非善友。或名多恐怖。或名種種戲
論。或名地獄性。或名非實義。或名貪欲擔。或名深重
根。或名隨心轉。或名根本空。諸佛子。所言苦集聖諦
者。彼攝取世界中。或名貪著。或名惡成辦。或名過惡。
或名速疾。或名能執取。或名想。或名有果。或名無可
說。或名無可取。或名流轉。諸佛子。所言苦滅聖諦者。
彼攝取世界中。或名不退轉。或名離言說。或名無相。

狀。或名可欣樂。或名堅固。或名上妙。或名離癡。或名滅盡。或名遠惡。或名出離。諸佛子。所言苦滅道聖諦者。彼攝取世界中。或名離言。或名無諍。或名教導。或名善迴向。或名大善巧。或名差別方便。或名如虛空。或名寂靜行。或名勝智。或名能了義。諸佛子。攝取世界說四聖諦。有如是等四百億十千名。隨衆生心。悉令調伏。

〔疏〕五東北方攝取世界。苦各地獄性者。未入忍來

常有墮性。

鈔未入忍心者。俱舍云。慳必至涅槃。頂終不斷善。忍心不墮惡趣。第一入離生。四善

根中。第三方便。免地獄。故知苦依之身。地獄性矣。根本空者。約性以說。同淨

名五受陰洞達空故。

同淨名者即迦旃延章謂不生不滅是無常義五受陰洞

達空無所起是苦義諸法畢竟無所有是空義於我無我而不一是無我義法本不生今則無滅是寂滅義今唯要一句至

第三住當廣分別耳。

集中由妄惑故愛見羅利。

橫相執取。妄體本空。故無可取。故中論云。虛誑妄

取者。是中何所取。佛說如是法。欲以示空義。

愛見等者

愛見羅利前已釋竟。二地經云。身見羅利於中執取。將其永入愛欲稠林。妄體本空者。由二義前名

執取。後名無所取。義似相違。故中論下釋無所取。即。是行品行。即是陰。謂小乘人。為菩薩立。過云。若

一切法空。何以佛說虛誑妄取。若有妄取。法則不空。故偈云。如佛經所說。虛誑妄取。相諸行。妄取故。

是名為虛誑。故論主舉得。以答。即如今疏所引。得。是此答意。云。由不了空。無所取。中而生取。著故云。

妄取。若有可取。不名妄取。明知說於妄取。正為滅。說空。如責賢人。妄取空華。正為顯華。是非有故。

道俱名離言者。滅性離言。道令言離故。滅性離言者。諸法寂

滅相。不可以言宣。故道令言離者。亡心體極。離言契滅故。

諸佛子。此娑婆世界所言苦聖諦者。彼饒益世界中。或名重擔。或名不堅。或名如賊。或名老死。或名愛所成。或名流轉。或名疲勞。或名惡相狀。或名生長。或名利刃。諸佛子。所言苦集聖諦者。彼饒益世界中。或名敗壞。或名渾濁。或名退失。或名無力。或名喪失。或名乖違。或名不和合。或名所作。或名取。或名意欲。諸佛子。所言苦滅聖諦者。彼饒益世界中。或名出獄。或名真實。或名離難。或名覆護。或名離惡。或名隨順。或名

根本。或名捨因。或名無爲。或名無相續。諸佛子。所言苦滅道聖諦者。彼饒益世界中。或名達無所有。或名一切印。或名三昧藏。或名得光明。或名不退法。或名能盡有。或名廣大路。或名能調伏。或名有安隱。或名不流轉根。諸佛子。饒益世界說四聖諦。有如是等四百億十千名。隨衆生心。悉令調伏。

〔疏〕六東南饒益世界。苦名如賊者。五盛陰苦。劫害我故。集名無力者。於出生死。無有力能善法治之。不復相拒故。滅名捨因者。無爲無因。而體是果。菩提之道。望此亦因。獨寂滅涅槃。得稱果果。故曰捨。

因。鈔無爲無因者。卽涅槃。師子吼品云。涅槃無因而體是果。若涅槃有因。不得名爲般涅槃也。謂涅槃之體畢竟無因。如無我所故。亦如俱舍無爲無因果。謂六因無五。但有能作。故名捨因而體是果。卽離繫果。菩提之道。望此亦因者。要得菩提證涅槃故。故此菩提亦名爲因。是果中因故。滅理涅槃。是因家之果。又菩提果家之果故。道名一切印。無不審決故。印

義後說

諸佛子。此娑婆世界所言苦聖諦者。彼鮮少世界中。或名險樂欲。或名繫縛處。或名邪行。或名隨受。或名無慙恥。或名貪欲根。或名恒河流。或名常破壞。或名炬火性。或名多憂惱。諸佛子。所言苦集聖諦者。彼鮮少世界中。或名廣地。或名能趣。或名遠慧。或名留難。

或名恐怖。或名放逸。或名攝取。或名著處。或名宅主。
或名連縛。諸佛子。所言苦滅聖諦者。彼鮮少世界中。
或名充滿。或名不死。或名無我。或名無自性。或名分
別盡。或名安樂住。或名無限量。或名斷流轉。或名絕
行處。或名不二。諸佛子。所言苦滅道聖諦者。彼鮮少
世界中。或名大光明。或名演說海。或名簡擇義。或名
和合法。或名離取著。或名斷相續。或名廣大路。或名
平等因。或名淨方便。或名最勝見。諸佛子。鮮少世界
說四聖諦。有如是等四百億十千名。隨衆生心。悉令
調伏。

〔疏〕七西南鮮少世界。苦名邪行者。體非正道。是行性故。集名廣地。生大苦樹故。宅主卽無明也。滅名絕行處者。心路絕故。道名廣大路者。先聖後賢游之而不厭故。

諸佛子。此娑婆世界所言苦聖諦者。彼歡喜世界中。或名流轉。或名出生。或名失利。或名染著。或名重擔。或名差別。或名內險。或名集會。或名惡舍宅。或名苦惱性。諸佛子。所言苦集聖諦者。彼歡喜世界中。或名地。或名方便。或名非時。或名非實法。或名無底。或名攝取。或名離戒。或名煩惱法。或名狹劣見。或名垢聚。

諸佛子。所言苦滅聖諦者。彼歡喜世界中。或名破依止。或名不放逸。或名真實。或名平等。或名善淨。或名無病。或名無曲。或名無相。或名自在。或名無生。諸佛子。所言苦滅道聖諦者。彼歡喜世界中。或名入勝界。或名斷集。或名超等類。或名廣大性。或名分別盡。或名神力道。或名衆方便。或名正念行。或名常寂路。或名攝解脫。諸佛子。歡喜世界說四聖諦。有如是等四百億十千名。隨衆生心。悉令調伏。

〔疏〕八西北歡喜界中。苦諦闕一者。晉譯少出生。唐譯少失利。集名無底者。煩惱深故。非習道學浮。沉

而不已。鈔非習道學浮者亦涅槃三十二師子吼品。恒河七人之意。習道是法學。浮是喻。

滅名破依止身。與煩惱互為依止。展轉無窮。唯證滅理。方能永破。道名廣大性者。無不在故。

諸佛子。此娑婆世界所言苦聖諦者。彼闍闍世界中。或名敗壞相。或名如坏器。或名我所成。或名諸趣身。或名數流轉。或名眾惡門。或名性苦。或名可棄捨。或名無味。或名來去。諸佛子。所言苦集聖諦者。彼闍闍世界中。或名行。或名憤毒。或名和合。或名受支。或名我心。或名雜毒。或名虛稱。或名乖違。或名熱惱。或名驚駭。諸佛子。所言苦滅聖諦者。彼闍闍世界中。或名

無積集。或名不可得。或名妙藥。或名不可壞。或名無著。或名無量。或名廣大。或名覺分。或名離染。或名無障礙。諸佛子。所言苦滅道聖諦者。彼關鑰世界中。或名安隱行。或名離欲。或名究竟實。或名入義。或名性究竟。或名淨現。或名攝念。或名趣解脫。或名救濟。或名勝行。諸佛子。關鑰世界說四聖諦。有如是等四百億十千名。隨衆生心。悉令調伏。

〔疏〕九下方關鑰世界。苦名我所成者。我見有故。集名我心。卽我見愛滅名覺分者。所覺處故。道名入義者。能入滅諦第一義故。

諸佛子。此娑婆世界所言苦聖諦者。彼振音世界中。或名匿疵。或名世間。或名所依。或名傲慢。或名染著。性。或名駛流。或名不可樂。或名覆藏。或名速滅。或名難調。諸佛子。所言苦集聖諦者。彼振音世界中。或名須制伏。或名心趣。或名能縛。或名隨念起。或名至後邊。或名共和合。或名分別。或名門。或名飄動。或名隱覆。諸佛子。所言苦滅聖諦者。彼振音世界中。或名無依處。或名不可取。或名轉還。或名離諍。或名小。或名大。或名善淨。或名無盡。或名廣博。或名無等價。諸佛子。所言苦滅道聖諦者。彼振音世界中。或名觀察。或

名能摧敵。或名了知印。或名能入性。或名難敵對。或名無限義。或名能入智。或名和合道。或名恆不動。或名殊勝義。諸佛子。振音世界說四聖諦。有如是等四百億十千名。隨衆生心。悉令調伏。

〔疏〕十上方振音世界。苦名匿疵。身爲惑病所藏處。故傲慢者。慢以生苦爲業。果取因名。染著性者。性令染故。如樂受壞苦。誰謂苦耶。駛流者。刹那性故。卽行苦也。不可樂者。苦苦也。覆藏者。藏苦因故。樂藏壞苦故。不苦不樂。藏行苦故。速滅者。流轉苦也。難調者。誰不欲捨。莫之能出。不憚疲苦。方能調之。

集名至後邊者。不斷無窮故。門者。入苦趣故。滅名不可取。取則不滅也。小之則無內。不容一物也。大之則無外。法界性也。道名難敵對者。有感必破。不爲惑破故。猶明能滅暗。則無暗而不滅。暗不滅明。何能相敵。第二隣次十界竟。

○第三類通一切

諸佛子。如此娑婆世界中說四聖諦。有四百億十千名。如是東方百千億無數無量無邊無等不可數不可稱不可思不可量不可說。盡法界。虛空界。所有世界。彼一一世界中說四聖諦亦各有四百億十千名。

隨衆生心。悉令調伏。如東方。南西北方。四維上下。亦復如是。

〔疏〕初舉娑婆以類東方。後舉東方以類餘九。

○第四顯主伴無盡

諸佛子。如娑婆世界。有如上所說十方世界。彼一切世界。亦各有如是十方世界。一一世界中說苦聖諦。有百億萬種名。說集聖諦。滅聖諦。道聖諦。亦各有百億萬種名。皆隨衆生心之所樂。令其調伏。

〔疏〕文中初舉此例。彼謂娑婆爲主。有密訓等盡空世界爲伴。後彼一切下。以彼類此。則知密訓等盡

空世界爲主。攝伴亦爾。則無盡無盡耳。此猶約娑婆同類世界而說。以結數中。同百億故。餘樹形等異類世界。彼一一類。皆徧虛空法界。是則重重無盡無盡。非此所說也。如是皆爲調伏衆生。鈔則知者。此有兩重。一卽釋迦在此爲主。攝密訓等爲伴。則在密訓爲主。攝娑婆等爲伴亦然。方是一佛之諦。二如此佛諦名。旣主伴無盡。則密訓等他佛爲主。諦名亦然。

論末後一段。是總都說十方世界無盡名目。皆是四聖諦爲體。從此四諦上。分作種種法門。五蘊十二緣總在其內。八萬四千塵勞解脫總在其內。如文具說。不煩更釋。已上佛名號品。四聖諦品。是自

已信進修行中所信之法。已下光明覺品。現佛境
及所行。行門徧周。如文具明。如是已上十信門。以
根本普光明智爲殿體。如是進修。究竟不離此智
也。

四聖諦品竟

建寧里大滌坊弟子江福勝
 禮江坑坊弟子江暨勝
 下路邊應福新禮甌寧千源范二姑
 同刻
 華嚴經四聖諦品疏論纂要第二十一
 卷伏願現增人天勝福罪證菩提妙果
 康熙庚申年四月誕日 華藏室謹題

大方廣佛華嚴經疏論纂要卷第二十一

江舜若謹